

Cabesante Victor Lopez:

Enseñanza ta pone enfasis riba mente di e mucha, y no riba su curazon y consenshi!

ORANJESTAD (AAN) -- Manera por a lesa den un articulo publica den nos edicion di diamars, señor Victor Lopez, cabesante di School Mon Plaisir MAVO, a haci un analisis profundo di varios factor di riesgo cu ta afectando, direct of indirectamente, nos hubentud.

E hecho cu seis hoben a perde nan bida den accidente di trafico, den e transcurso di apenas seis siman, tin su persona mescos cu hopi ciudadano mas di nos comunidad, hopi preocupa. Su aporte pa trece concientizacion den sikiera un parti di nos pueblo, ta loke e ta expresando aworaki atraves di DIARIO, unda a resalta su preocupacion cu den enseñanza escolar mes "enfasis ta worde poni riba e mente, y no den e curazon y consenshi di e mucha".

TRES TENDENCIA DEN EDUCACION DI CAS:

Victor Lopez ta haya cu den nos comunidad tin tres diferente tendencia, den e manera di educa yiu.

Uno, e mayornan cu ta laga nan yiunan den total libertad di accion, sin frena esaki; dos, e mayornan cu ta trece un balansa otorgando nan yiu un libertad equilibra cu cierto limitenan necesario; y tres, e mayornan cu ta sumamente severo y cu ta pone exigencianan, cu como ser humano, e muchanan no por cumpli cu nan.

Señor Lopez a reitera cu muchanan cu ta worde teni den cas manera den un prison, y cu ta haya strafe ora nan no por cumpli cu exigencianan severo, ta busca manera pa nan huy for di e situacion di stress aki, y tin diferente mayor ta perdiendo nan yiu pasobra nan no ta duna nan e trato equilibra cu nan merece. "Pero Dios gracia nos tin suficiente mayor cu si ta crea nan yiu cu un educacion balansa, pero nan no ta e problema. E problema ta cu nos ta wak cu e situacion ta bayendo den un situacion unda cu comunidad ta man na cabes, y ta puntra su mes ta kico ta pasando", señor Lopez a expresa.

Señor Victor Lopez a conta DIARIO cu diahuebs ultimo, e cu su personal docente a participa den un seminario cerca un profesional, pa wak si e por yuda nan con pa guia e muchanan di school.

"Pasobra enberdad, anos como school y como enseñanza en general ta un tiki pega. Nos no sa con pa sigui y nos ta wak cu tin cosnan ta bay for di man. Na mi opinion nos ta yegando na e fase cu nos ta laat pa remedia cierto actuacionnan", el a acentua.

Na su opinion e cosnan cu ta pasando cu nos hubentud ta pa habri nos tur nos wowonan. E mes a ripara cu un accidente cu consecuencia fatal a sosode diamars madrugada, y ora solo a sali ya caba tabata tin hopi chofer riba caminda coriendo na

velocidad hopi halto, comosifuera esey ta loke ta normal.

ENSEÑANZA Y FALTA DI ESTIMULO

Den e seminario a saca como conclusion, segun señor Lopez a splica, cu nos hobennan a cuminsa tuma over di nos como adulto, y cu, aparentemente, nos como adulto no ta haciendo nos trabao manera mester ta, y nos hubentud ta bay su rumbo na manera cu nan ta kere ta bon.

"E ta simplemente bisa, pero si nos tuma aki mes enseñanza como ehemplo, nos ta bibando den año 2001 y te ainda nos alumnonan ta worde manda cu stencil y mas stencil, y djis skirbi over. Pese-y hopi alumno ta bisa ayo, y nan no ta bay cierto lesnan. Nan no ta drenta simplemente pasobra nan ta conciente cu nan inteligencia ta asina leu cu nan por capta mas cu solamente haya un stencil 'kens'".

Cu esaki loke señor Lopez kier muestra ta cu e muchanan di awendia ta demanda pa computer y pa nan haya trabao na nan nivel, pues "challenge mi inteligencia, y mi t'ey".

Señor Lopez a acentua cu mayoria di school na Aruba no ta conta cu computer pa facilita e muchanan e aprendizaje di e tecnologia cu ta dominando mundo y lo sigui su desaroyonan acelera den e milenio aki.

FALTA DI ESTIMULO DEN CAS:

Fuera di e aspecto menciona prome, señor Lopez a indica cu tin diferente hoben cu ta stima nan mayornan, pero nan ta nenga di bay den e direccion cu nan mayornan kier pusha nan.

Muchanan kier muestra cu nan tin nan propio ideanan, y poco poco por ripara cu hobennan ta haci manera nan ta kere cu ta mehor.

"Den e sentido aki mi no kiermen cu ta malo, pero asina nan pensamiento ta. E ta aboga pa mayornan apoya nan yiunan, por ehemplo, den loke nan kier studia pasobra si no, nan mes ta crea frustracion.

Por ehemplo, ora un hoben kier studia pa mecanico pasobra esey e gusta, pero su may-

ornan kier pa e bira docter. Nan ta menosprecia e trabao cu e hoben kier haci, siendo cu den e trabao ey e yiu lo ta feliz, y esey ta e parti importante den bida cu hopi biaha ta worde lubida".

EDUCANDO E MENTE, NO E CONSENSHI:

Otro aspecto cu a bin dilanti den e seminario ta cu na school nan ta educando e mente, pero no e curazon y consenshi di e mucha.

"Eynan mi ta kere ta e yabi pa

habri e porta pa yega na un solucion. Nos ta constantemente bezig cu e mente, y si wak enseñanza en general e ta les, les, les nos ta hinca aden, anto nos ta wak kico ta sali afo, pero nos no ta puntra si nan ta compronde loke nan a siña y si nan por aplique", señor Victor Lopez a señala. Den un tercer y ultimo articulo lo por lesa e opinion di señor Lopez tocante un di e vicionan cu ta afecta nos comunidad: "influencia di alcohol".